

Filmiliornermi aningaasartuutit utertinneqartarnerat pillugu Inatsisartut inatsisissaattut siunnersuummik saqqummiussinissamik Naalakkerusisut peqquneqarnissaat pillugu Inatsisartunut aalajangiiffigisassatut siunnersuut. Inatsimmi nunatsinni filmiliornermi aningaasartuutit 25 %-iinik utertitsisinnaanissaq pisinnaangortissavaa, maannalu aningaasanut inatsimmi oqaasertaliusaaq aqqutigalugu maleruagassiorneq taarsissallugu.
(Inatsisartunut ilaasortaq, Peter Olsen, Inuit Ataqatigiit)

Akissuteqaat

(Meeqqanut, Inuusuttunut, Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Siullermeerneqarnera

Inatsisartunut ilaasortaq, Peter Olsen, Inuit Ataqatigiit Inatsisartunut aalajangiiffigisassatut siunnersuuteqarneranut Naalakkersuisut sinnerlugit qutsavigaara.

Filmiliornerup suli nukittorsarneqarnissaanut Naalakkersuisut isumaqataapput, tamannalu utertitsisinnaanerup pisinnaangortinneratigut ilaatigut pisinnaavoq. Taamaattumik aalajangiiffissatut siunnersuut Naalakkersuisut akuersaarnartippaat.

UKA 2023/46-p: ”Filmiliorarneq pillugu Inatsisartut inatsisissaannik Naalakkersuisut saqqummiussinissamik peqquneqarnissaannik Inatsisartut aalajangiiffigisassaattut siunnersuut. Inatsisissatut siunnersuut kingusinnerpaamik UKA2024-mi Inatsisartunut saqqummiunneqassaaq” oqaluuserineqarnerani aalajangerneqarpoq kingusinnerpaamik UKA 2024-mi Naalakkersuisut filmiliorarneq pillugu Inatsisartut inatsisaannik saqqummiussissasut.

Taanna UPA 2022/75-imik nangitsineruvoq, taassumalu kingunerisaanik suleqatigiissitamik pilersitsisoqarmat nunatsinni filmiliornerup qanoq nukittorsarneqarsinnaanerani innersuussutinik suliaqartoqarpoq. Suleqatigiissitap ilisimasaqartutut innersuussutaasa ilagaat utertitsisinnaaneq, Naalakkersuisullu maluginiarpaat suleqatigiissitaq isumaqarmat maannakkut utertitsisinnaanermik aqqissuussineq naammanngitsoq piviusunngortitsinermilu atornerarsinnaanngitsoq, tak. konto pingaarneq 24.10 Toqqaannartumik akileraarutit.

Filmiliorartut nunatsinni aalajangersimasumik najugaqartut, filmiliorartunik nunanit allaneersunik suleqateqartut nunatsinneersut filmiliorartut suleqatigalugit suliaminnik pilersaarusiameinnillu piviusunngortitsinissaminnut eqqumiitsuliornermut tapiissutinik Kalaallit Nunaanni Eqqumiitsuliornermut Aningaasaateqarfimmit qinnuteqarsinnaatitaanerat Naalakkersuisut maluginiarpaat.

Taamatut oqaaseqarlutik Naalakkersuisut allannguutissatut siunnersuut inassuteqaatigaat:
”Filmiliorneq pillugu Inatsisartut inatsisissaattut siunnersuummut Filmiliornermi aningaasartuutit utertinneqartarnerannik aqqissuussinerup ilanngunneqarnissaanik Naalakkersuisut peqquneqarnissaat pillugu Inatsisartunut aalajangiiffigisassatut siunnersuut.”